

Biografía di Jossy Adriaan Jr.

Jossy Adriaan Brokke a nace na Aruba, dia 15 di juli 1947. Jossy su nombenan di cariño ta Papichi, Pichois, Papi y Jos. Tin algun mas, pero Jossy no ta bay hinca nan den su biografía, pasobra esaki lo cay fo'i otro. Number di Jossy su tata ta Jose Juliano Brokke, su mama ta Maria Magdalena Brokke-de Cuba. Jossy a nace den bario di Oranjestad. Su wela tabata biba den Nieuwstraat. Esey ta e caya cu ta core paralelo cu Wilhelminastraat na unda antes tabata tienda Habibe. Jossy tin seis ruman mas. Total nan ta dos homber y cinco mucha muhe. Jossy ta number cinco di e famia. Number di casa di Jossy ta Sandra Lourdes Ponson. Nan tin cincuenta aña casa. Sandra ta di e famianan Ponson cu ta di pariba di brug. Su fecha di nacemento ta 30 di juni 1946. Nan a casa na aña 1969. Esaki ta e mesun fecha cu Merca a baha riba luna pa biaha. Den Jossy su famia tin mas musico, su tata por ehempel tabata un cantante di tango y su mama no por a keda keto nunca ora e ta den cas pariba pabou, ta canta su cancionnan. Jossy tin un ruman muhe cu number artistico Dhaddy Brokke, kende ta hopi conoci. Su number di nacemento ta Nidia Veronica Brokke.



Segun Jossy, e bida artistico a dun'e tur loke e ta gusta y stima.

Jossy ta gusta masha hopi di ta artista

E bida artistico pa Jossy simplemente a dun'e loke e ta gusta y loke e ta stima. E ta gusta masha hopi di ta artista. E ta sinti'e artista, aunke e ta bieu, manera nan ta bisa. Pero e no ta piki pieu. E ta keda manera un cangreu contra nan. Pa colmo su signo ta cancer! Jossy ta keda semper riba su pia te na unda cu e por. Pa Jossy, su bida a keda y lo keda semper artistico. E tin asina gana di compone pa e muchanan tambe bay padilanti.

E bida artistico.

Jossy a cuminsa canta for di un edad hopi hoben. Cu nuebe aña caba Jossy a canta den un pais cu no ta Aruba. Pa motibo cu su tata tabata cahero principal di gobierno, e tempo aya, cada seis aña tur ambtenaar den gobierno ta haya un vacacion di seis luna pa e por biaha cu su famia bay afo. Nan a bay Costa Rica. E prome biaha Jossy tabatin nuebe aña. Banda di unda nan a keda, tabatin un misa, manera unatedral grandi na unda tur diadomingo su tata kier bay cu nan. Ora cu misa caba, manera na casi tur pais latino, tin un parke net ey dilanti cu semper tabata yen di musico. Jossy a bay canta cu e mariachi. Tabata fantastico. Su rumannan a bisa Jossy cu e tin cu sigui canta. Aki na Aruba tabatin un programa di radio "Buscando talento artistico", cu a trece hopi artista local riba pia cu e hendenan no tabata sa mes di nan. Bo ta haya oportunidad di bay den e programa ey, tur diadomingo for di 10 or di mainta te banda di 2 of 3

or di atardi. E radiostacion tabata situa na e Lucky Strike Building cu ta warda di polis awor aki den Wilhelminastraat. Eyriba, na di dos piso, e tabata tuma luga. Anto bo ta haya despues di dos, tres biaha di programa tur hende ta bin cu guitarra pa toca y canta. Despues di un luna, bo ta ripara cu e cos a cuminsa crece. Mientrastanto Aruba a haya su prome hotel grandi, esta Aruba Caribbean Hotel. A bin e orkesta di e hotel cu ta Fasola. Anto nan tabata toca y compañía algun hende. Tabatin un pianista cu Jossy no ta lubida nunca mas. Esaki ta e maestro Emelindo Eleonor. E tabata un Dominicano, un tremendo musico cu a siña nan hopi cos. Hopi hende ta bay, anto nan tin un mesa largo dilanti. Esnan cu canta, toca of haci nan actuacion bon, ta haya un recompensa. Esnan cu no hacie bon, nan ta bati bel duro y e hendenan ta hari bo. Bo tin cu ensaya bon, pa bo bin bek otro biaha. Tabatin un cos masha great cu Jossy ta corda. Tabatin un

Un ijscream di Piet ta kita tur verdriet


persona, un señora grandi caba cu yen di yiu ta cana pariba pabou. E señora aki a traha un slogan pa un di e sponsernan di e programa ey cu ningun hende por a kere.

Pasobra tabatin premio pa ora bo gana, si tur cos a bay bon y bo no a haya bel. Nan ta duna bo un “certificado di regalo”. Anto Adison Croes tabata buscando un manera di promove Piet Soda Fountain, cu tabata su promotor di mas grandi. Wel, e señora aki a bin cu un slogan: “ Un ijscream di Piet, ta kita tur verdriet!” E cos ey a pega te dia di awe. Tur hende kier bin pa nan gana un baki ijscream. Baki ijscream asina grandi. Waw! Tur hende ta come na cas. Naturalmente bo ta percura pa bo canta bon.

Dedicacion y estilo musical

E cuatro tabata un instrumento cu Jossy tabata stima masha hopi. Milo Muyale tabata toc’e prome cu Jossy. El a siña Jossy pa asina nan por toca hunto, pasobra e ta toca su harpa anto Jossy tabata canta. E cu su amigo Milo a haya nan te na Las Vegas Nevada den convencion. Tabata e convencionnan mas grandi cu tin na mundo pa promove paisnan. Nan a toca den Thunderbird hotel na las Vegas, un di e hotelnan di mas grandi. Nan tin grabacionnan cu nan a haci te awor aki cu tabata hopi bon. Jossy a toca

e cuatro basta tempo largo. E cu Milo. Ora el a bay Hulanda pa basta tempo, Jossy a bay riba su guitarra. Bek na Aruba, el a bay toca den hotel. Ya Milo a stop di toca, anto e ora Jossy a sigui den e hotelnan, pero cu su guitarra. Cantando su musica mexicano tur locual e mes ta skirbi. For di e tempo ey, Jossy a cuminsa skirbi tambe. E prome cancion cu el a yega di skirbi y mesora a pega un hit duro cune ta na Spaño, un bosanova. Su titulo ta “No me dejes.” Jossy a grab’e hunto cu “The Strangers” di Savaneta.



Jossy Brokke cu su guitarra

Desaroyo musical



Jossy Jr. y su Grupo “Los Casiques” na Tele Curacao na año 1964



Grupo “Los Llaneros”

Foro d.r.p.d.: Francis Kelly (cuarta), Andres Wernet (maraca), Camilo Muyale (Harpa), Jossy Brokke Jr. (Cantante), Humphrey Kelly contra (bajo.)

Jossy a bisa caba cu Milo tabatin mester di un hende pa toca cuatro y el a bira manera un “must” pa Jossy. Nan tabata mescos cu dos ruman cu otro. Te hasta Jossy tabata biba na su cas pa un tempo. Su mama y su tata tabata stima Jossy masha hopi. Anto asina ey, el a bin desaroya e tocamento di cuatro. Milo tabata toca bon, e tabata domina e cuatro masha bon mes, anto el a siña Jossy. E ora ey, nan a forma e grupo Los Casiques. Pero prome cu esey, Jossy tabata toca maraca caba. Pasobra el a bay toca cu Francis y Humphrey Kelly, mientras e ruman homber

grandi Efrain Kelly tabata e manager di e grupo. Sr. Filie Volkerts, kende ta tata di e cantante Shirley Volkerts tabata yuda hopi tambe. Luis Bruges ta toca guitarra, pero den e banda e tabata toca un tiki baho tambe. Jossy ta sigui conta. Nos a yama e grupo Los Casinos. Pasobra nos tabata haci hopi cos cu casino. Anto despues di esey, mi a bay Hulanda, anto e ora ey nan a keda cu e grupo. Nan a lant’e cu Milo, anto nan a yam’e Los Llaneros. Nan a busca algun otro musico, te ora m’a bin bek for di Hulanda, anto e ora ey m’a cuminsa cu Milo atrobe cu e grupo ey.

Grupo cu a haci presentacion cu nan



Na Aruba ta Los Casinos na Palm Beach Club, Los Llaneros, Jossy cantando durante Miss Teen Internacional, representando Antiyanan Hulandes den Festival di OTI den Teatro Luis Alarcon na Acapulco Mexico na 1977, Grupo Los Caciques na Tele Curaçao na 1964. Jossy a compañía Ety

Topenberg y su Trio Huasteca durante festival di cancion Antiyano na 1967 den De Veer Theater, tambe na Hulanda, Alemania y Suiza. Jossy a hiba na Suisa, un grupo cosistiendo di Dhaddy Brokke, Tony Sherman y Lino Emerencia. Ya ora bo scucha nan, bo sa caba kico bo ta haya. Tabatin un musico Jose Usetia di Venezuela y tambe dos Argentino, cu Jossy a conoce na caminda di tocamento. Di biaha bo sa ken ta bon y kende no, ken ta cumpli. Bo sa tur e cosnan ey pa bo traha un bon grupo. Pasobra ta Novopark hotel nan a bay na Zürich, Suisa. Anto tambe cu

Titie Vrolijk y un orkesta grandi Jossy tabata move tur caminda cu ne. Asina ey, tabatin hopi otro bandanan cu Jossy a toca cu nan. El a yega di toca un biaha cu Glenn Gaddum tambe. E ultimo aki ta masha conoci na Hulanda. E tin un bon studio di grabacion tambe.




E parti Internacional

Jossy a haci hopi presentacion pafo di Aruba, entre otro na Corsou, Venezuela, Republica Dominicana, Cuba, Hulanda, Alemania, Suisa y Mexico.

Grabacionnan realisa

Jossy tin diferente grabacion realisa. El a graba cu Antonio Lacle y tambe na Voz di Aruba, Jossy a graba en bibo via radio, anto e tin esaki riba disco. Jossy su prome CD “Mi ta busca bo”, “No ta bal la pena”, “Ainda mi t’ey”, “Pais”, “Aruba Amor Patrio”, “Juan del diablo”, “Amor berdadero”, “Mi señora”, “Mi dushi Papiamento”, “Tera dushi”, “Guitara”,



“Mi amor”, “Bisa danki na bo bida”, “Bida ta pasa”. Tambe un dobbel-CD color blauw. Den esun prome, bo ta tende Jossy ta canta fo’i tempo cu e tabata mucha chikito. E grabacion ey a tuma luga via radio Voz di Aruba. Tabatin un programa cu yama “Aruba Carclub” tur anochi, anto den e programa ey nan a graba dies piesa.



Acontecimiento cu Jossy ta considera mas importante den e bida artistico

Cosnan cu semper a impresiona Jossy, ta festival di cancion di nos mes un hendenan. Nos mes un cantante- nan. Pasobra e artistanan ta gana tereno, sigur e publico ta wak con bon nan a train, nan ta gana un trofeo cu balor den nan carera musical. Si bo no tin e sorto di cosnan ey, bo no tin e apoyo, e bida artistico ta bira duro. Nos ta un isla chikito, sinembargo aya afo, por ehempel na Corsou mes, tur e cosnan ey nan tin. Nan si ta yuda bo. Esaki ta un estimulo grandi pa e artista sigui padilanti.

Sugerencia pa futuro generacion

Pa duna sugerencia tin biaha ta dificil, pasobra bo tin diferente caracter di hende. Jossy ta sugeri pa tur artista train bon y serio. Busca e genero di cancionnan cu ta bay cu bo. Pasobra un cancion mester cuadra cu bo personalidad. Tin biaha un hende ta canta un cantica of ta toca un cantica cu no ta bay cu su personalidad. E ora e no por interpret'e cu exito. Tur e cosnan ey Jossy a siña durante su biahenan. Jossy lo conseha pa duna tur otro cu tin interes, caminda pa cana y si tin cu yuda, yuda nan bay den e bida artistico ey, pasobra e no ta facil tampoco. Pero, Jossy ta gust'e y lo sigui den dje te na final. E ta kere tur hende tambe por. Si bo ta gust'e, e ta drenta bo sanger sigur.

